



Broj: 02-19-2184/25
Lukavac, 21.07.2025. godine

➤ **Gradsko vijeće Grada Lukavac
n/r Predsjedavajući Gradskog vijeća**

PREDMET: Stav lokalne zajednice u vezi sa Nacrtom Prostornog plana za područje Tuzlanskog kantona za period 2025-2045, dostavlja se

Poštovani,

U toku je javna rasprava na Nacrtu Prostornog plana za područje Tuzlanskog kantona za period 2025-2045, a koga na prijedlog Vlade Tuzlanskog kantona usvaja Skupština Tuzlanskog kantona. Ovo je važan dokument, koji je potreban i našoj lokalnoj zajednici, te smo u dosadašnjem toku aktivnosti delegirali nekoliko zahtjeva, uključujući sve objektivne primjedbe i zahtjeve koje smo imali. U nacrtu koji je upućen u javnu raspravu nije uvrštena većina naših zahtjeva, a uvrštene su neke promjene o kojim nismo konsultovani, a mogu itekako imati negativan uticaj na stanovništvo i imovinu. Borit ćemo se da se uvažavaju naši zahtjevi i suprotstavljati onima koji su protivni našim interesima ili koji se unose u Prostorni plan bez adekvatnih prethodnih radnji.

S tim u vezi smatramo da je nepohodno da Grad Lukavac zauzme jedinstven i zvaničan stav prema Nacrtu Prostornog plana za područje Tuzlanskog kantona, kako bi se zaštitili interesi lokalne zajednice, obezbijedilo transparentno planiranje i spriječile posljedice po zdravlje i okoliš.

Zahtjevi i stavovi lokalne zajednice Grada Lukavac u okviru javne rasprave o Nacrtu Prostornog plana za područje Tuzlanskog kantona za period 2025-2045 se ogledaju u slijedećem:

1. Grad Lukavac je imao svog predstavnika u Savjetu za izradu prostornog plana koji predlaže Vlada Tuzlanskog kantona, a usvaja Skupština Tuzlanskog kantona. U predloženom dokumentu nije usvojena većina zahtjeva koji su upućeni predlagaču u toku izrade prijedloga, te se protivimo predloženom dokumentu sa zahtjevom da se do sada upućeni prijedlozi uvrste u dokument. U prilogu broj 1 ovog akta sadržani su pojedinačni prijedlozi.

2. Grad Lukavac će tokom javne rasprave prikupiti dodatne prijedloge i zahtjeve zainteresiranih strana koje ocijenimo prihvatljivim, te istim proširiti listu zahtjeva za korekciju dokumenta. Tim povodom tražimo da se organizuje hitan sastanak sa predstavnicima Ministarstva prostornog uređenja i zaštite okolice Tuzlanskog kantona, te Ministarstva industrije, energetike i rudarstva Tuzlanskog kantona, kako bi se razjasnile i preispitale sporne tačke i spriječile posljedice daljnjeg ignorisanja stavova lokalne zajednice.

Strana 1 od 3



ISO 9001:2015

No. 308550 QM15

Grad Lukavac - Gradonačelnik, Trg slobode 1, 75300 Lukavac
www.lukavac.ba, e-mail: kabinet-nacelnika@lukavac.ba
Tel. +387 35 366 700, fax: +387 35 366 703



ISO 9001:2015 No.
308550 QM15

3. Grad Lukavac nije konsultovan po pitanju bilo kakvih novih rudarskih aktivnosti metala, nemetala ili kaustobiolita na našem prostoru. Nije poznato kakva su vršena konkretna istraživanja, a izvjesno je da nije provedena nikakva studija uticaja na okoliš niti je obavještena zainteresirana lokalna zajednica, te ističemo da nema zakonskog osnova da se prostornim planom uvode bilo kakve kvalifikacije ili ograničenja u prostornom planiranju bez zakonski provedenog prethodnog postupka.

4. Po Zakonu o rudarstvu moguće su dvije kategorije prostora: istražni prostor i eksploataciono polje. Smatramo da je ucrtavanje bilo kakvog poligona kao "istražnog prostora" ili neki drugi oblik zakonski neutemeljenog kvalificiranja prostora neprihvatljivo bez prethodnih postupaka. Potencijalne geološke rezerve moraju se dovesti do nivoa istraženosti dovoljnog da se mogu prostorno planirati, a trenutno za područje naše lokalne zajednice takvih dokumenata nemamo. Dalje insistiranje na ovom pitanju smatrat ćemo nezakonitim, te poduzeti mjere zaštite interesa lokalne zajednice.

5. Protivimo se unošenju u prostorni plan bilo kakvog novog odlagališta šljake, pepela ili drugog materijala, kao i bilo kakvoj promjeni namjene ili tehnologije odlaganja na postojećim odlagalištima koje se ne provode u skladu sa propisima i naučno utemeljenim metodama. Upoznati smo da Elektroprivreda BiH planira miješanje otkrivne na PK Šikulje sa pepelom iz TE Tuzla, te odlaganje kompozita na postojećem odlagalištu. Apsolutno odbacujemo ovaj pristup i ističemo da je dosadašnje vođenje postupka nezakonito, jer nije uključilo lokalnu zajednicu i nema studije uticaja na okoliš, kao i da je predloženo rješenje neprihvatljivo jer takve varijante nauka danas ne poznaje i čitav je spektar očekivanih negativnih uticaja na stanovništvo. Dosadašnji slijed postupaka nije u skladu sa propisima, odnosno već su prekršena prava lokalne zajednice, te ćemo poduzeti sve mjere u skladu sa propisima i nenasilnim metodama zaštite. Insistiramo da se iz prijedloga briše ova mogućnost, odnosno da se ne vrši nikakva promjena tehnologije i namjene postojećeg odlagališta na PK Šikulje. Oспорavamo tvrdnje da se ovim nastoji „popraviti odlagalište“ ili „dodatno stabilizirati“, jer je ono jedno od najstabilnijih u Rudnicima Kreka, a eventualna potreba dodatne stabilizacije morala bi biti dokumentovana, uz utvrđene uzroke, propuste i traženje najbolje metode za sanaciju, a ne za „ugradnju“ ogromnih količina pepela i šljake na visoke kote odlagališta, odakle bi se stvorili uslovi za njihovu disperziju zrakom, tlom, površinskim i podzemnim vodama. Odlagalište PK Šikulje je projektovano za jalovinu (otkrivku), sa istraženim geomehaničkim osobinama (ugao unutrašnjeg trenja, vlažnost, sigurni nagibi kosina, sigurne visine kosina, filtracione karakteristike, uticaj vlažnosti na koheziju...). Miješanjem "zemlje" sa pepelom iz TE Tuzla teško da bi se pojačale vezivne karakteristike materijala i vjerovatno bi imali pun vazduh pepela i rijeku Spreču dodatno zagađenu teškim metalima. Nigdje u svijetu nije zabilježena ova metoda, a jedinstven stav učesnika u raspravi je da se ovakav način odlaganja neće desiti u našoj lokalnoj zajednici. Smatramo da je prije bilo kakvih izmjena odlagališta nužno sprovesti nezavisnu studiju uticaja na okoliš koju će provoditi institucije od povjerenja i u kojoj će učestvovati predstavnici lokalne zajednice i stručnjaci iz oblasti geotehnike, ekologije i javnog zdravlja.

6. Kriterije kako je dobro šljaku voziti u Lukavac jer je blizu i najjeftinije za TE, te da nema više vremena jer se kasni, apsolutno odbacujemo, jer će loše rješenje tek izazvati posljedice i troškove. Spriječit ćemo svaki pokušaj realizacije ovog projekta, ali stojimio na raspolaganju da razgovaramo o rješenju koje će biti optimizirano po relevantnim faktorima. Termoelektrana Tuzla proizvodi energiju i za naše potrebe i duboko smo svjesni potrebe saradnje i učešća u rješavanju ovog problema, ali nikako ne prihvatamo da se dodatno preko leđa građana provedu „brza i jeftina rješenja“ čiju bi pravu cijenu plaćale buduće generacije stanovnika. Teret društvenog razvoja naša sredina već nosi od svog nastanka, te je za bilo kakva buduća okolinska opterećenja nužno komparirati širi prostor i utvrditi nivo uticaja i zagađenost, te ravnomjerno distribuirati i odgovornost za pepeo i šljaku iz TE Tuzla.

7. Insistiramo da se prostornim planom TK nametne rudarskim preduzećima cjelovito ispunjenje zakonske obaveze „zatvaranja rudnika“ u prostorima u kojim se eksploatacija ne odvija u skladu sa Zakonom o rudarstvu. Takvih prostora je u našoj zajednici preko 3.000 hektara, a u nekim dijelovima više od 50 godina je zarobljen prostor zbog pasivnog odnosa države prema obavezi rudarskih preduzeća. Od Kalajeva, sela koga danas nema, preko PK Šićki Brod, kopova Lukavačka Rijeka, Pašići, Huskići, jame „Zagorje“ i niza davno napuštenih rudnika ovi prostori danas propadaju i blokirani su kao „pasivna imovina“ rudnika, iako je zakonski jasno da su rudarski operateri mogli u ovim prostorima vršiti eksploataciju u skladu sa dobivenim dozvolama i odobrenim projektima, a da je ovaj vid višedecenijske blokade prostora nezakonit. Stanovništvo pojedinih naših mjesnih zajednica, a posebno MZ Šikulje i MZ Huskići su direktno pogođeni svakodnevno nizom štetnih uticaja, te insistiramo da se prostori za koje rudarski operater nema odobrenu dokumentaciju kao „eksploataciono polje“ ili „istražni prostor“, u skladu sa važećim Zakonom o rudarstvu, prostornim planom predvide za određnu namjenu a da se u opisu propište resornim ministarstvima obaveza da status ovih prostora usklade sa važećim propisima.

Grad Lukavac će formirati stručni monitoring tim koji će pratiti tok daljih izmjena Prostornog plana, predlagati amandmane i koordinirati komunikaciju s građanima i predstavnicima Kantona.

U konačnici ovaj dokument treba da predstavlja snažnu platformu za zajednički nastup naše lokalne zajednice i svih aktera u procesu odlučivanja, da ukaže na zloupotrebe, pokušaje ignorisanja lokalne zajednice i nelegalne postupke. Istovremeno isti nema za cilj blokiranje razvoja, već osigurati da razvoj bude zakonit, transparentan i u skladu sa javnim interesom.

GRADONAČELNIK

Dr. Sci. Edin Delić

Dostaviti:

1. Naslovu,
2. Služba za urbanizaciju, imovinske i geodetske poslove
3. Evidenciji 2x i
4. Arhivi.